



Inatsisartunut ilaasortaq
Mette Arqe-Hammeken, Naleraq
/Maani

**Ittoqqortoormiit eqqaanni Uunartumi piniariarfimmi puilasunik
kissartunik eqqissisimatitsineq pillugu § 37 naapertorlugu
apeqquteqaammut nr. 213-2025-mut akissut**

Asasara Mette Arqe-Hammeken

Brevdato: 19-12-2025
Sagsnr.: 2025 - 26212
Akt-id: 26052050

Postboks 1614
3900 Nuuk
Tlf.: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

Inatsisartut Suleriaasianni § 37, imm. 1 naapertorlugu Ittoqqortoormiit eqqaanni Uunartumi piniariarfimmi puilasunik kissartunik eqqissisimatitsineq pillugu Naalakkersuisunut apeqquteqaateqarputit.

Apeqquutitit uannit akisassanngorlugit innersuunneqarput.

**1. Ittoqqortoormiut ungasinngisaani piniariarfimmi Uunartup eqqaani
nunap iluaniit imeq kissarteq aniasoq eqqissisimatitaava?**

Akissut:

Pinngortitamik illersuineq pillugu Inatsisartut inatsisaanni (Pinngortitamik illersuinnermut inatsit) § 21 naapertorlugu illoqarfiit nunaqarfiillu killeqarfiisa avataanni puilasut kissartut pinngortitami immikkut ittutut illersorneqarput. Taakku ilusaannik allannguisoqaqqusaanngilaq.

Naalakkersuisut Pinngortitamik illersuinnermut inatsimmi § 23 naapertorlugu § 21-mi inerteqqummik saneqqutsisinnaanissamut akuersisinnaapput, tamannali taamaallaat immikkut ittumik pisoqartillugu pisinnaavoq. Taassuma atuunneratigut Naalakkersuisut inatsit malillugu aqutsinnerminnut atatillugu sukannersumik suleriaaseqarsinnaapput. Pinngortitami illersugassat immikkut ittut, Kalaallit Nunaanni pinngortitami asseqanngitsutut isigineqarnerat tamatumunnga tunngavilersuutigineqarpoq. Immikkut ittumik akuersissuteqartoqarnissaanik qinnuteqaatinik naliliinnermi, ilaatigut suliat iliuusissalluunniit suut pineqarnersut ilaatinneqartarput. Tassani aamma pinngortitami immikkut inissisimasut pingortitamut nalingi ilanngunneqartarput, assersuutigalugu iliuuseqartoqassappat tamanna naasut uumasullu, suut eqqorneqassanersut ilaatinneqarlutik.

Ittoqqortoormiit eqqaani, Uunartumi puilasut kissartut nunaqarfitoqqami Uunartimi (Kap Tobin) inissisimapput. Kommuneqarfik Sermersuumi kommunimut pilersaarut malillugu sumiiffik asimi inoqarfiusimasutut inissinneqarsimavoq, sumiiffimmillu ingerlatsinnermi takornariaqarneq sunngiffimmilu sammisaqarneq inissaqartinneqartussaapput.

Aatsitassanut inatsisip ataani pisinnaatitaaffinnik pigisaqartunut, sumiiffinni kissartunik puilasulinni suliaqarnissamut kissaateqartunut suliasat nalinginnaasumik § 87 (Aatsitassanut tunngasunik suliaqarneq pillugu Inatsisartut inatsisaat nr. 16, 13. juuni 2023-meersoq), § 35 (Najukkani aatsitassanut tunngasunik suliaqarnerit pillugit, Inatsisartut inatsisaat) imaluunniit Kalaallit Nunaanni sumiiffinnut ornigulluni sulisarnermut aamma aatsitassanut tunngatillugu, (kulbrintit pinnagit) nalunaaruteqartarnermut maleruagassat, 2000-imi novembarimeersoq, puilasooq kissartoq kaajallallugu illersuiffik 100 m-inut killeqarfilerneqartoq aqqutigalugit maleruagassiuunneqarsimapput.

1. a Eqqissisimatitaappat sooruna eqqissisimatitaasoq?

Akissut:

Puilasut kissartut / kissarneri allanngorneq ajortut, kissassusaat ukioq kaajallallugu kissassusaat allanngorneq ajorput, aammalu ukiumut agguaqatigiissillugu avatangiisit kissassusiinit kissarnerusarlutik. Puilasut taamaattut kulturikkut, ilisimatusarnikkut aningaasaqarnikkullu naleqarput, aammalu nunap iluaniit nukissiornermut, helium-imik piiaanermut takornariaqarnermullu iluaqutigineqarsinnaapput. Tamatuma saniatigut puilasuni kissartuni eqqaannilu uumasunut naasunullu immikkoorutilinnut uumanissamut tunngavissiisarput.

2. Innuttaasunut iluaqutinngorlugu qanoq atorluarneqarsinnaava?


Akissut:

Apeqput 1 a-mut akissut takuuk.

3. Atorluarneqalernissaanut pisortanut aningaasatigut, allaffissornikkullu kingunerisassai, namminersortunut aningaasatigut allaffissornikkullu kingunerisassai kiisallu innuttaasunut aningaasatigut allaffissornikkullu kingunerisassai suusinnaappat qanorlu naleqassappat?

Akissut:

Pisortanut, namminersortunut innuttaasunullu aningaasatigut allaffissornikkullu kingunerisassanut puilasut qanoq atorneqarnissaat apeqqutaassapput. Suliap inuiaqatigiinnut nalinganik naliliinermi atuinissamut periarfissat piviusunngortinneqanngitsut allat nalingi ilanngunneqartariaqarput.

Inussiarnersumik inuulluaqqusillunga


Peter Borg